

SANTIAGO

Santiagoa o'manigmadoya'uyate.

**Judío huaknopoe'eritaj
o'manigmadoya'uyate Santiagoa.**

1 ¹Do Santiago ijje. Diosen Huairi Jesucristoenerere huanaba' ijje. Opud Israel huaknopoe'eritaj o'nigmadoya'ne. Nog aratbutenbayo nogbayo nogbayo mo'ika'ne. Saludos on'dikta'mona'ne.

**Diosa daka' mo'nopoea'nok
huadakda kika'dik o'ene.**

²Kenoka' pai'da e'nopo'epi' dakhue' ee'pi' pai'da ee'pi' mon'durugpakika'.
³Oro' oknopoe'batikdikpi' ka'ne'po e'dikdikpi' nogiti nogiti Diostaj daka' mo'noknopoi'ka' Diostaj mo'noknopoeonhuahuika'po batikhue' mo'nika'.
⁴Nogiti nogiti eknopoi'ka'nayo dakhuea' e'ka' kikhue'dik o'ene kenpa'ti kenda Diosa o'pakika'nig nogiti nogiti kika'dik o'eonhuahuika'apone. Dakhuapa Dios Huairitaj moknopoeonhuahuika'apone.

⁵Opudomeytaj nogda nogda dakhuea' kagke'po e'dikdikpi' katepi' e'ka' nopoe'hue'da ee'nayo Diostaj yan'tiona'pakikati'.
Do'taj konigy'oda daka' e'kika' menopoea', yan'tiona'pakikati'.
Diosa bo'tihuapokpo daka' e'kika' mo'nopoea'apone. Diosa sue'nopo ehue' o'epo e'tihuapokta' o'pakpo

daka' e'kika' mo'nopoea'ika'apone.
⁶"Daka' e'ka' menopoea', Dios."
Yan'tiona'pak. Diosa mo'nopoea'apone.
Daka' yan'nopoi'ka'. Diostaj daka' oknopoe'hue' ee'nayo tihuapokhue'dik mo'ika'apone.
^{7,8}Be'api' nogpa' nogpa' o'nopoe' konig oy Diostaj oknopoe'po eme'te oknopoe'hue' o'epo kentaj Diosa tihuapokhue' o'ika'apo. Daka' huakika' nopoe'ahue' o'epo.

⁹On pai'da huae'eri ee'pi', eg', Cristotaj iknopoe'po yan'durugpakika'po Diosensi'po i'ene.
¹⁰Konig huakhuen ida o'aypo okhuenkahua'ika' konigti huakka'da huamatoe'eri a'ti on'mabueyikaponok konigepo Diostaj kanoknopoe'po kan'durugpakike'.

¹¹Kenoka' niokpo o'behuikdepo diga'da o'ta'tepo huakhuen ida okhuenaya'ika' huehuela'da o'kotika'.
Ona'ti 'uruda ehue' o'epo. Huabokerek huakka' on'matoika' konig huakhuen o'nepo, e'baa'ika'pi' ida on'buey.

**Kenoka' dakhuea' kagke'po
e'dikdikte dakhuea' kahue' yanika'.**

¹²Opuda dakhuea'da kagke'po e'dikdikte dakhuea' kahue' e'ika'nayo durugda mo'ika'apone.
Nogok nogok dakhuea' kagkike'po e'dikdikte kahue' e'ika'nayo:
—"Huadakda bo'kika'po dakhuea' kagkike'po e'dikdikte dakhuea' kikhue'

mo'ika'nok huairi mo'epo do'hued jakyo doere yan'noeonhuahuika.'" Do'hua o'nona'apone. —Kenda Diosa huadi' huag'eritaj o'mana'uyate.

¹³Kenokapi' dakhuea' kake'po Diosa medikdikne nopoehue'dik yanika'. Dios kenpa'da huadaknopo'da o'ika'. Dakhuea' kake'po Diosa madikdikhue'dik o'e kenpa'ti dakhuea' kagke'po Diosa oro'taj didikdikhue'dik mo'ika'ne. ¹⁴Huakkuru oro'en e'pakika'a dakhuea' e'ka' huanopoya'da o'eretpakpo ¹⁵nogok diga'da o'eretpakpo huaboa'da dakhuea'nada o'kika'ne. Ken dakhuea'da e'kika'nayo kenpa'da o'bueyapone. Diosere ehue'dikda o'ika'apone.

¹⁶Huata'da nama'da nopoehue' mo'nika', huadi'da egomey pogomey. ¹⁷Katepi' Diosa mo'nigkika'ne kenpa'ti bo'tihuapokika'ne kenpa'da huadakda o'ika'. Diosya' kurudya' kenpa'da huadakyoda bo'yokika'ne. Niokpo puugere aya'da siokpoere Diosa o'kuyate. Niokpo sikyo ta'tehue' o'ika'. Siokpo puugere huame'noe ta'tehue' o'ika'. Diosnayo huakjey huaka'eri huadak o'ika'. Diosnayo nogok nogok konigti huadak o'ika' kenpa'ti nogok nogok konigti huadak o'kika'. Nogpa' nogpa' manahue'dik o'ika'. ¹⁸Dios o'pakpo ke'nen buttida hua'aa mo'nopo'noika'ne. Konig Diosen huakkurueri huasi'po konig 'urusi'po Diosa e'bae'po mo'nopo'noeanhuahuika'ne.

Nama'da Diostaj kikhue' mo'nepo 'urunopoda 'uruada mogkika'.

¹⁹Konigepo do'hued huadi'da egomey pogomey Diosbata' e'peeta' yaderetpakika'. Daka' yan'nigpeika'. Daka' nopoehue'ada ida e'manmadika'ta' pakhue' yane'. Daka'da e'peepi' diayhue' yanika'.

²⁰Kena'po oro' o'diaypo kenda Diosa

o'paknig kikhue'dik o'ene. O'diaypo Diostaj durugpakahue'dik o'ene.

²¹Kenpa'ti aya'da dakhuea' e'nopo'e' aya' dakhuea' e'kika' kenpa'da mon'batik. Apagba' o'peedeme'ne kenpa'ti huaboa'da o'peepo huanopoya'da daka'da mon'nigpeika'. Apagba' 'uruada ogka'dik mo'ene. Oro'taj Diosere onte'ti noeanhuahuika'dik mo'epone.

²²Diosenba'taj daka'da mon'nigpeika'po mogkika'. E'peeada kikhue' ee'nayo nama'da on'pee. ^{23,24}Be'api' huabokerek Apagba'taj o'peepo kate kika'dik ijje'y huaboa'da o'nopoenig'a kikhue' ee'nayo ken konig huabokerekpi' sigda o'oktiahuayatupo konig huakok o'enig huaboa'da o'nopoenig'a ida okkahue'ika'. ²⁵Diosen huadak hua'a 'urunanada o'enok e'nigpeikata' o'pakpo Diosen huadak hua'a okkahuehue' mo'nepo mon'nigpeika'po mogkika'. Diosen huadak hua'a o'nigpeika'po durugnanada o'ika'apone.

²⁶Be'api' Diosen ijikikay e'nopo'eada dakhue' o'adhuaahuika'po batikhue'dik e'eada Diosen ijikikay nama'da o'nopoenig'a Diosen kahue'dik o'ika'. ²⁷Diostaj e'batadi'kea'ta' e'paknayo Diosen e'kika'ta' e'paknayo kenpa'ti Apag Diostaj e'durugpaka'ta' e'paknayo pai'da ayhuayotaj ayhuaeretaj di' yan'maepo yan'tihuapokika'. Konig nog aratbut dakhuea'da on'kika'nig konig kikhue' yanika'. Kenda Diosa o'pakika'.

Huakka' huatamae'eritaj e'pakada pai'da huag'eritaj pakhue' ee' nopoehue' mo'nika'.

2 ¹Do'hued huaknopo'e'eri egomey pogomey, Jesucristo Huairitaj daka' mo'noknopoika'po be'edpi' huakka'da o'tamaenok huadakda o'e nopoehue'dik mo'nika'. Noga pai'da ee'te kennayo dakhue'da

o'e nopopehue'dik mo'nika'. ²Opud e'kupopakya' Diostaj e'batadi'kea'yo huairi e'kudnayo oro huabapiokot o'matopepo 'uru'ada yudtaj o'otpo kenpa'ti pai'da huae'eri e'kudnayo yudtatone'da o'otpo. ³Uru'ada yudtaj e'huaottaj bo'tihuapokpo, "In 'uru huahuadte yahuad." Ea'ada pai'da huae'eritaj "Ayopi' yabo'. Sorokte yahuad," ena'nayo ⁴dakhuea'da ka'dik mo'ene. Opudpi' aya'da konigti huadak mo'ene. Huairinayo huadak o'ne. Pai'da huae'eri dakhuea'da o'ne. Nama'da mo'nopoenig'a dakhuea'da mo'nopoe. Ken konig dakhue' o'e.

⁵Yan'pee', huadi'da egomey pogomey. Diosa huakka' pai'da huae'eritaj o'bae'ika'. Kenomeya Jesucristotaj daka'da o'noknopoika'po Diosere Jesucristo huairiere durugda on'noehuahuika'apo. Aya'ada Diostaj huadi'da o'nepo Diosere o'neonhuahuika'apo. Diosa kenpa' oa'uyate. ⁶Pai'da aratbuttaj dakhuea'da mo'manika'nok on'bira'ika'. Huairitaj huadakda bo'kika'nig'a huakka'da huamatoe'eria opudtaj dakhuea'da mo'nika'ne kenpa'ti opudtaj dakhuea' a'huaya'po gobierno huairite bo'tohua'ika'ne. ⁷Huairi huakka' huamatoe'eria Jesucristoen huadiktaj dakhuea'da on'huaa'ika'. Ke'nen 'uru huadik opud mo'diktoika'ne.

⁸Konig o'na huata'da huakka' i'pakika'nig nog aratbuttakon konigti huakka' di' yan'maika'. Kenda Dios Huairia Apagba'te o'mana'ika'. Kenda e'kika'nayo huadaknada bo'kika'ne. ⁹Huakka' huamatoe'eritaj di'da e'maika'ada pai'da aratbuttaj dakhuea'da e'kika'nayo Diosen e'mana'taj nigpeehue' mo'ika'po dakhuea'da bo'kika'. ¹⁰Diosa huakka'da huadik oro'taj mona'uyate. Moisesenba'taj aya'da nigpeika'dik o'ene. Oro' nog aya'da e'nigpeeada

nogdiktida nigpeehue' ee'nayo Diostaj dakhuea'da o'e. Konigti Diostaj nigpeehue' ee' o'e. Dakhuea'da o'e. ¹¹"Nogen huatoe'taj bakdejue' yanika'." Diosa o'mana'uyate. "Nogtaj yadiaypo arakhue' yanika'." Kenpa'ti nogdakon Diosa o'mana'uyate. Nogen huatoe'taj bakdejue' e'ika'ada nogtaj e'araknayo aya' Moisesenba'taj nigpeehue'da i'ene. Dakhuea'da i'ka'ne. ¹²Jesúsen huadak hua'a o'pakpo o'nigpeika'ne. Oro' e'nigpeika'nayo Diosa di' mo'epo, "Huadakda bo'kika'uy." Mona'apone. Konigepo nogomeytaj di' mon'maepo 'uru'ada mo'da'ika' kenpa'ti huadakda mogkika'. ¹³Oro'a pai'da huae'eritaj kan'matinepahuike' Diosa kenda o'pak. Oro' nogomeytaj matinepahuihue' ee'nayo Diosa oro'taj tinepahuihue' mo'ea'apone. Oro' pai'da huae'eritaj e'matinepahui'nayo Diosa bo'tiahuaypo oro'taj mo'tinepahui'po dakhuea' bo'kika'ne onahue' mo'ea'apone.

**Diostaj eknopoe'nayo
'urudayo' yag'kikati'.**

¹⁴Diostaj Jesúseretaj yoknopoey. Opuda ea'ada pai'da aratbuttaj tihuapokhue' e'ika'nayo "Diostaj yoknopoey," nama'da bo'a'nig'a Diostaj nama'da moknopoeng'a Diosa dakhuea' e'ka' nopo'yareahue' mo'ea'apone.

¹⁵Huaknopo'e'eri huama'buy huidpopi' pai'da ee'nayo yudtaj toehue' ee'nayo aypopi' toehue' ee'tada ¹⁶"Uru'ada yahuati', yudtaj yatoe', Diosa mebayoke'. Aypo yabape', Diosa mebayoke'." Opud Jesúsen huaknopo'e'eria ea'ada yudtaj yokhue' ee'nayo aypo yokhue' ee'nayo kenda nama'da ea' dakhuea'da o'e.

¹⁷O'na Cristotaj yoknopo'e' ea'nayo nogomeytaj daka'da tihuapokika'dik i'ene. Tihuapokhue' ee'nayo nama'da Cristotaj iknopoene, do'hued huama'buy.

¹⁸Sue'dada Diostaj yoknopoe y kenpa'da oda'ika'. Noga kenpa'da huadak ogkika'. Huadak kikhahue' ee'nayo Cristoen huaknopoe'eri o'e do oknopoe'hue'dik o'ene. Nogomeytaj doa e'tihuapokika'nayo Cristoen huaknopoe'eri o'e nopoe'dik mo'ene. ¹⁹Nogtida Dios o'ika' mo'nopoika'ne. Kenda huadak ee'pi' huadak kikhahue' ee'nayo onte'ti Diosere noehue' mo'ika'apone. Toto' kenpa'ti Diosen huadik eknopoda diga' o'nokme'pukika'. ²⁰Diostaj ijnopoe'poyo'da dakuuapa o'e mo'nopo'epo huadak kikhahue' ee'nayo kenda Diostaj eknopoe' dakuuapa ehue' o'e. ²¹Menpa' bokkahue'de. A'nennada Diosa oro'en adhuea'pane' Abrahamkudaktaj "O'nensi'po menigarak," ona'uyatenig. Kenoka' Diosa Abrahamtaj ena'te Abraham Diostaj o'nigpeika'po huasi'po Isaactaj a'nigarakya'po ote'yo o'tohua'uyate. "Huadakda i'ene." Diosa Abrahamtaj ona'uyate. ²²Ken Abraham Diostaj oknopoe'epo Diostaj konig dakuuapa o'nigpee'uyate nopoe'dik mo'ene. Diostaj eknopoika' e'nigpeika'ere Diosa o'pakika'. ²³Apagba' oa'uyatenigda Abraham o'nigka'uyate. Do'taj meknopoika'nok "Huadakda i'ene, Abraham." Diosa ona'uyate. Kenpa'ti Dios Abrahamtaj huadi'nada o'tajika'uyate.

²⁴Diostaj moknopoenok kenpa'ti mo'nigpeika'nok "Huadakda mo'ene." Diosa ona'dik mo'eapone. Eknopoe'yo'da dakuuapa ehue' o'e. ²⁵Konigti Rahab huakupete huabakdejeri e'eda botta' Diosen aratbuttaj o'batihuapoknok, "Huadakda i'ene." Diosa ona'uyate. Judío aratbut huata'mona'eritaj Rahab ke'nen jakyo sorotataj a'batihuapokya'po o'bakuda'uy kenpa'ti nogdagpen o'mata'mona'uyate. ²⁶Konig

aratbut e'bueyde' huaso'yo huanokireg toehue' o'nika'. Konigti be'api' Diostaj eknopoe'ada Diostaj daka' nigpee'hue' o'nepo Diostaj oknopenig'a konig e'bueyonig oknopoika'.

Huakitta'a konig oa'ika'.

3 ¹Huakka'da Diostaj huamanmadika'eri yahuehue' yanika', do'hued egomey. Diosa aya' huamanmadika'eritaj daka'da o'mapeika'. Nama'da e'manmadika'nayo diga' castiga mogka'apone. ²Oro'omey huakka'da nama'da o'kika'ne. Be'api' o'batia'pakpo nama'da ahue' e'ika'nayo huadaknada o'epo aya'da katepi' o'ka'po huadakda kika'dik o'ika'apo. ³Caballo oro'taj me'nigpee'po tioroe'dik caballo huakitta'yo siropasi'po o'kudika'ne. Meyopi' ehua'ta o'paknok bo'tohua'ika'. Huakittaya' siropasi'po caballo huaso'eta' tioroika'dik o'ene. ⁴Kenpa'ti huaboro' barcotone' o'nepo kuperinatone' e'oroa' bapoka' o'tohua'ika'. Huata'pobeta'eri huanokhuayaga'si'po o'badapo o'tionbahue'epo keyoda ehua'ta o'pakpo ojpaendik o'ika'. ⁵Kenpa'ti oro'en huaso' huaboro'da ee'pi' huakitta' suhuigda o'epo huiyokda ika'dik o'e. Huakitta'a a'dik o'e. Kenpa'ti oro'en huakitta' konig pai'pasi'ponig ee'pi' huaboro'da bakpakdik o'e. Konigti oro' nama'da ea'nayo huakka'da dakhuea' ka'dik o'ika'ne. ⁶Oro'en huakitta' konig ta'ak e'bakpakonig dakhuea'da ka'dik o'e. Oro' huata'da dakhuea' ogka'dik o'ene. Toto'a on'paknok aratbut dakhuea'da oda'pakika'. O'noepo oro'en huakitta' konig ta'ak e'bakpakonig o'epo dakhuea'da kika'dik o'eonhuahuika'ne. ⁷Aya'da dubayo huae'eri toyahue'dik o'ne. Aya'da bakoy, barakte huae'eri, huahueyo huae'eri toyahue'dik o'e. ⁸Aratbutnayo huakitta' toyahuehue'dik o'ne. Daka' toehue'dik

o'nika'. Konig bihui e'buey'uru huakitta' o'toepo mabueya'dikonig o'epo. Oro'en huakitta' dakhuea'da kika'dik o'e. ⁹Oro'en Apag Diostaj "Huadakda i'ene," ona'ika'ne oro'en huakitta'a. Dios konig o'enigda huabokerektaj o'ka'uyate. Huabokerektaj dakhuea'da e'huaa'nayo oro'en huakitta'a, "Dios dakhue'da o'e," o'huaika'ne. ¹⁰Nogtia'da huakitta' o'toepo Diostaj "Huadakda i'ene," oa'po kenpa'ti huabokerektaj dakhuea'da o'huaa'ne. Ken konig o'ika'ne dakhue'da o'e, do'hued egomey pogomey. ¹¹'Uruda hue'ey pai'ere nogtida jenuhuipo' onyayo' orokhue'dik o'e. ¹²Menpa' mangote kumehui' dapakdik ya'e. Ehue' dapakhue'dik o'e. Apoarete menpa' jo dapakdik ya'e. Ehue' dapakhue'dik o'e. Kenpa'ti hue'eypai' jenuhuipo' 'uruda hue'eyere orokhue'dik o'e. Huadakdikyo'da moda'ika'.

Diosa 'uruda e'kika' mo'nopoëa'ne.

¹³O pudomeyere huakka'mon 'uruda e'kika' daka' mo'nopoë. 'Urua'da ijkikay nopoëhuae'ada huaknopoë'eri kan'tiahuae'po huadakda kagkike'. ¹⁴On dig e'matioknopoñka'nayo kenpa'ti huakka'da huata' e'eretpaknayo "Huakka' ijnopoëpo huadaky'o' ijkikay." Ahue' yae'. Dapi' a'dik i'et. ¹⁵Dig e'matioknopoñka' kenpa'ti huata'da e'eretpak Diosa kenda nopoëahue' mo'ene. Ken konig eka'nayo nama'da bo'kika'apone. Dakhue'nopo'da mo'enok kenda ka'dik mo'ene. Toto' huairia mo'nopoëa'nok kenda bo'kika'apet. ¹⁶Dig e'huahuayika'nayo kenpa'ti huata'da e'eretpakika'nayo diga'da e'maboyika'nayo nogtaj nogtaj dakhuea' on'mana'pakika'apo kenpa'ti nogda nogda dakhuea'da on'magkika'apo. ¹⁷Diosa oro'tanayo 'uru'a'da e'ka' mo'nopoëa'nok onte'ti

dakhuea' kikhue' mo'ne. Diostaj 'uru'a'nada mogkika'. Nogomeytaj mon'noeynoeyika'. Huadiayhue' mo'nika'. Daka'da mon'nopoëpo nog aratbuttaj daka' mon'batia'pakika'. Nogomeytaj huadakda mon'mapejka'. Nog aratbuttaj mon'matinepahui'po mon'tihuapokika'. Nogtaj nogtaj huadakda mogkika'. Daka' mon'nopoëpo mon'batihuapokika'. ¹⁸Oro'nayo o'manoeya'po kenpa'ti nogomeytakon o'manoeynoeyika'nok nogomeykon huadakda yag'kika'apet.

Indariyo nogta' nogta' e'eretpakada mon'nopo'korea'po Dioseno'da mon'eretpakika'.

4 ¹Nogte opuda huayahuaya diga'da mo'bahuadiayika'ne kenpa'ti mo'magkika'ne. Huakka'da bo'eretpakika'ne. Nogpa' nogpa' dakhue'dikyo bo'eretpakika'. ²Katetapi' huakka'da bo'eretpakpo toëhue' mo'epo noga o'toenok aktoeya'po kentaj bo'arakika'. "Beyok, Dios," onahue' mo'ika'po toëhue' mo'ika'ne. ³"Beyok," Diostaj ena'tada Dios ontaj yokhue' mo'enok Diostaj nama'da i'pakpo ina'nig'a o'nada i'pakpo nama'da Diostaj i'tiona'paknig'a konig Diosa o'paknig tiona'pakhue' mo'enok Diosa yokhue' mo'ika'ne. ⁴Huatoe e'toëada nogtaj nogtaj o'pakika'nig konig mo'ika'ne. Huakka'da bo'pakika'. Kenpa'da katetapi' e'eretpakika'nayo Diosen taka'onig mo'ene. ⁵"Diosen Nokireg oro'taj mo'nopo'toëpo huakka'nada bo'pakika'ne." Menpa' Apagba' kenpa' nama'da yaa'. ⁶Diostaj men'nigpejke'po Diosa mo'tinepahui'po bo'tihuapokika'ne. "Huata'tada huapakeritaj Diosa pakhue' e'ëada pai'da ijje'y huanopoë'eritaj o'matinepahui'po o'manopo'korea'ika'." Apagba'te kenpa' oa'ika'. ⁷"Ontaj me'nigpejke'po be'tihuapok, Dios,"

yan'tiona'pakika'po toto'taj nigpeehue' yanika'. Toto'taj nigpeehue' mo'ika'nok bokhua'apone. ⁸Dioštaj nogiti nogiti yan'pakika'po yan'tiona'pakika'. Dioštaj e'tiona'pakika'te Dios oro'ere meyoehue' o'epo bo'tihuapokika'apone. Nama'da e'kika'nayo Dioštaj yan'nopo'korea'. Diošeretaj katetapi' e'eretpakika'nayo yan'nopo'korea'po Dioštayo'da onte'ti yan'pakika'. ⁹Dioštaj dakhuea'da bo'kika'po pai'da ya'nepo yan'huik. Dioštaj nigpeehue' mo'ika'po yan'erikbatik. Yan'durugpakbatikpo yan'huik. Nama'da ijkikamey yan'nopo'epo yan'huik. Huadaritaj durugpakikahue' yanika'. ¹⁰Dakhuea' ijkikame'po Diosensi'po ehue'dik ijjeapet, Huairi. Yan'tiona'pakika'. Diosa bo'tihuapokapone. Diosensi'po mo'yahuea'apone.

**Cristotaj huaknopoe'eri
huama'buytaj dakhuea'
huaahue' yanika'.**

¹¹Huayahuaya dakhuea' bahuaahue' yanika', egomey pogomey. Huama'buytaj dakhuea' e'huaa'nayo di' ehue' mo'epo Cristoen hua'atakon dakhuea' bo'huaa'. Huanigpee'eri ehue' mo'epo dakhuea' huaa'eri mo'ene. ¹²Diosayo'da huadak huakika' hua'a o'mana'uyate kenpa'ti Diosayo'da aratbuttaj dakhuea'da ogka' huaa'dik o'e. Diosa oro'taj noanhuahuika'dik mo'epet kenpa'ti Dios oro'taj e'pogtone' ta'akyo en'dik mo'epet.

**Eme'te kate o'ka'apetnig
Diosayo'da o'nopo'e.**

¹³“Oy eme'tepi' adyonda huakka' jakyo oro' o'hua'apone. Nogbayoktida o'ika'apone. Kenteda o'baadhuahuapone. Huakka' huakupe o'baeyapone.” Opud kenda boa'nig e'batia'pakta' ijpaki. ¹⁴Inpa' ia'nig'a monig eme'te o'epetnig nopoe'hue'

o'ene. Eme'te menpa' noe'dik o'et nopoe'hue' o'ene. Menokpi' oro' bueydik o'ene. ¹⁵“Dios oro'en Huairi e'paknayo oro' o'noeapone. Dios Huairi e'paknayo inpapi' nogpa'dapi' o'ka'apoy.” Kenpa' ika'dik o'ene. ¹⁶Opudnayo do'huada ijpakpo ijka'apoy boa'ika'nig'a kenda dakhue'da o'e. ¹⁷Kenda Diosa o'pakika' mo'nopo'ene. Opuda kenda kahue' e'ika'nayo dakhuea'da mo'ene.

**Huakka'da huamatoe'eritaj, iKeyoj!
Santiagoa o'maboroay'uyate.**

5 ¹Yan'pee', opud huakka'da e'mato'e'nayo huakka'da e'eretpaknayo pai'nada mo'nopo'epo huakka' bo'huikapone. Huakka'da basagkeae'dik mo'epone. Opud dakhuea'da mo'eonhuahua'apone. ²Huakka'da mo'mato'enig'a o'bapara'de. Huithuit o'nen 'uru yudtataj o'bape'de. Dakhue'da o'ede. ³O'nen oro huakupe o'nen plata huakupe huakka'da e'mato'ika'pi' ehue' mo'epone. Huakka'da e'to'eda pai'da aratbuttaj bayokhue' mo'ika'nok dakhuea' ogka' on'huaa'aponok kene'huaya' huame'noete Diosa castiga mogka'apone. ⁴O'nen ta'bate huakka'da aratbut on'baadhuahuaya'uyate. Huakka'da e'taetada dakuhaa bayokhue' mo'mae'uyok “Oyda huakupe beyok,” 'utta'da beyok e'nona'te Dios kurudyo sorotataj huairia o'mape'edepo castiga mogka'apone. ⁵Indariyo mo'noepo huakka'da mo'mato'ika'po huakka'da mo'durugpakika'po konig 'uhua huasihuada arakdik mo'ika'nig konigti huabo'da kenpa'da bueydik mo'epone. ⁶Huadak ee'pi' “Bueydik o'ene,” mona'ika'ne. Opud huakka' huamatoe'eria mo'mana'po kenomeytaj mo'barakika'ne. Opudtaj be'a tiokahue'dik mo'enok bo'arakika'ne.

**Cristo e'tiaktaj daka'da
yan'nigunhuahuika'. Dakhue' ee'taj
yan'tiona'pakunhuahuikati'.**

⁷Konigepo Jesús Huairitaj e'tiaktaj daka'da yan'nigunhuahuika'. Ta'ba

huaka'eria daka'da on'nigepo
on'batukepo e'takerekte
on'nigunhuahua'. E'boyogtaj daka'da
on'nigika'. Nogok nogok e'hui'te
on'nigunhuahuika'. E'taboyogde'te
'uruda aypo jakyo on'totiakika'. ⁸Konig
ta'ba huaka'eri daka'da o'nigika'
konigti Jesús Huairitaj daka'da
yan'nigikati'. Daka'da yanoknopoika'
Diostaj. Jesús Huairi ida o'tiakaponok
batikhue' yanika'. ⁹Huama'buytaj
huayahuaya dakhuea'da huaahue'
yanika', egomey pogomey. Kenpa'
e'huaa'ika'nayo "Dakhuea'da boka'ne."
Diosakon a'dik ya'e'apet. Jesús
'ibodteda o'ede a'timon o'tiakapo.
¹⁰Sue'ada Diosen huamanbatia'pakeri
Dios Huairien hua'a
on'manbatia'pakika'uynok dakhuea'
huakeri kenomeytaj dakhuea'da
on'magkika'uyate. On'bahuadiaypo
dakhuea'da on'magkika'uynig'a
kenomey Diosen huamanbatia'pakeri
batikhue'da onte'ti Dios Huairien
hua'a o'manika'uyate. Kenda huadak
ogkika'uyatenig yan'nopoepo konigti
yag'kika'. Diosen yag'kika'po batikhue'
yanika', egomey pogomey. ¹¹Kenomey
Diosen huamanbatia'pakeri pai'da
e'nopo'epi' Diosen e'ka' batikhue'da
ogkika'uyate. Diosen ogkika'po
durugda o'nika'uyate, oro' o'nopoene.
Job o'basetpo dakhue'da ee'pi' Diostaj
daka'da oknopoehuahua'po
oknopoebatikhue' o'uyate. Nogok
Diosa Jobtaj ona'ti huadakda o'ea'uyate.
Diosa o'tinepahui'uyate. Konigti
Jesús en huaknopo'e'ritakon di'da
o'maepo o'matinepahui'ika'.

¹²Daka' o'nonay. Daka' men'pee',
egomey pogomey. Kenpa'da buttida
yada'ika'. Diosa castiga kahue' ka'e'po
"ee', ijka'apoy," ea'nayo kenda yakati'.
"Keje'," ea'nayo kahue' yaeti'. "Ijka'apoy
Diosapi' kurudya' be'tiahuayne."
Ahue' yanika'. "Ijka'apoy huadariapi'

kenda me'tinopoene." Ken konig ahue'
yanika'.

¹³Be'api' pai'da e'nopo'ete
Diostaj yan'tiona'pakika'. Diosa
be'tihuapokikapone. On durugda be'api'
ya'nepo Diostaj yan'batadi'kea'ika'.

¹⁴Be'api' dakhue' ee'nayo Diostaj
huaknopo'e'eri huamatoe'eri
huairitone'taj kan'tiake'po
yan'mata'monika'. Kenomey
on'tiakdepo sue'da huasihuaj
e'kutioyde'te Diosa kayare'po
kan'nigtiona'pakike'. ¹⁵Diostaj daka'
o'noknopoika'po on'tiona'paknok
dakhue'taj Diosa o'yarea'apo. Ona'ti
huadakda o'epo. Dakhuea' eka'nayo
Diosa bekkahuea'apone. ¹⁶Konigepo
nogtaj dakhuea'da eka'nayo kentaj
yahuahua'po, "Nama'da ogka'ne,
bekkahuea'," ya'dika'. Ken konig
huayahuaya ya'dika'. Kenpa'ti nogda
dakhue' e'huae'taj nog dakhue'
e'huae'taj yan'mationa'pakika'.
Diosa ya'bayarea'apet Diosa
o'pepo o'yarea'apo. ¹⁷Diosen
huamanbatia'pakeri Elías oronigton
o'uyate. "Huihue' kaunhuahue'."
Kenoka' Diostaj diga'da enade'te bapa'
huabayok seis puug e'pok huihue'
o'unhuahua'uyate. ¹⁸"Kahuie'." Nogok
Elías enade'te ona'ti o'hui'ika'uyate.
Ta'bayo aypo o'bakerekuyate.

¹⁹Opud nogtiada Diosen buttida
e'manmadika'taj eknopoika'ada
dakhuea' eka'nayo nog huaknopo'e'eria
o'tihuapokpo onte'ti Diostaj
e'nopo'korea'nayo huadakda
o'ka'apo. ²⁰Ke'na Diosen buttida
e'manmadikataj ona'ti nigpee'hue'
o'edepo dakhuea'da o'ka'nok. Be'api'
kentaj Diosba'te o'boroaypo dakhuea'
e'ka'taj o'nopo'korea'po ona'ti dakhuea'
kahue' o'epo. Kenpa'da Diosa enhue'
o'epo. Diosere o'noehuahui'ka'apo.
Huakka' dakhuea' e'kika'ta' Diosa
o'bakkahuea'apo. Kenda yan'nopoika'.